

բա համար. միայն գործն է, որ արժէք ունի: Նա վերաբերում է մարդուն ըստ իր գործի, առանց ի նկատի ունենալու, թէ ո՞վ է այդ գործի հեղինակը — երկրի առաջին պաշտօնեա՞ն, թէ՞ վերջին խոզարածը: Նոյն պայմաններում կատարուած նոյն գործի համար ամէնքը հաւասարապէս նոյն վերաբերմունքն են ստանում օրէնքից — թէ՛ վարձատրութիւն, թէ՛ պատիժ:

Այս երեք հիմքերից էլ բղխում է օրէնքի անսահման հեղինակութիւնը եւ փրկարար ոյժը Շահամիրեանի համար: Աստուց յետոյ օրէնք: «Օրէնք մեր եղիցին տէր եւ թագաւոր մեր. բայց յօրինաց մերոց այլ ոչ ոք ծանիրցուք զերկէր, բայց Արարիչ Աստուած միայն» (89):

Այժմ տեսնենք, թէ օրէնքը կարո՞ղ է երջանկացնել մարդուն եւ ի՞նչպէս:

Հեղինակի կարծիքով, շատ բան հարկաւոր չի՝ մարդուն երջանիկ անելու համար: Հարկաւոր է միայն երեք պայման — առաջին՝ որ մարդն ազատ լինի իր նմանների, այսինքն՝ ուրիշ մարդկանց չարազորութիւններից. երկրորդ՝ որ նրա բնական իրաւունքները պաշտպանուած լինին, եւ երրորդ՝ որ նա ապահովուած լինի կառավարական պաշտօնեաների եւ ընդհանրապէս պետութեան դէմ: Եթէ իրականութեան մէջ գոյութիւն ունեն այդ պայմանները, այնուհետեւ այլեւս որեւէ արտաքին պատճառ չի կարող մարդուն արդէլք լինել, որ նա իր բոլոր կարողութիւններով երջանկութեան ձգտի եւ կամ մի անգամ արդէն ձեռք բերած երջանկութիւնը ապահովաբար պահպանի:

Եւ Շահամիրեանի օրէնքը այդ երաշխիքները տալիս է մարդուն:

Վերեւում արդէն դիտել տուինք, որ հեղինակի կարծիքով մարդկային դժբախտութիւնների ամենամեծ մասն առաջանում է իր՝ մարդու փոփոխական բնութիւնից: Օրինակ, նրա խաղաղ հոգին մէկ էլ տեսաք փոթորկի նման բռնկեց, դրանով պատճառ դառնալով մի շարք դժբախտութիւնների՝ իր եւ ուրիշների համար: Կամ՝ միշտ դժգոհ իր ներկայ վիճակից եւ ունեցածից, նա շարունակ ձգտում է առաւել երջանկութեան եւ աւելին ձեռք բերելու, յաճախ կանգ չառնելով միջոցների առաջ: Հետեւանքը լինում է այն, որ նորից ծնւում են

բազմաթիւ չարիքներ ու դժբախտութիւններ՝ իր եւ ուրիշների համար: Կամ՝ «աին ընդ ահան» ի սկզբունքով ղեկավարուելով կեանքում, ստեղծում է նորանոր չարիքներ ու դժբախտութիւններ՝ իր եւ ուրիշների համար:

Այսպէս կարելի էր երկար շարունակել փաստերի այդ շարանը, որոնք ցոյց են տալիս, որ մարդը ինքն է չարիքների ու դժբախտութիւնների մեծագոյն աղբիւրը՝ իր եւ ուրիշների համար: Իսկ դժբախտութիւնը եւ չարիքը երջանկութեան հակառակ դադափարներ են:

Հետեւապէս — ըստ Շահամիրեանի — անհրաժեշտ է մի միջոց, անհրաժեշտ է շղթայի նման մի բան, որը մարդու ձեռքը յետ պահէր չարագործութիւն ու դժբախտութիւն անելուց՝ իր եւ ուրիշների համար, որով եւ նպաստած կը լինէր մարդու երջանկութեանը: Եթէ չլինի այդ շղթան, «այսօր ես կը փշրեմ իմ հարեւանի ատամը, վաղը դու կը փորես քո եղբոր աչքը, երրորդը կը յափշտակի իր դրացու ունեցուածքը. այդպիսով երկիրը կը լեցուի անօրէնութեան դարչահատութեամբ, ժողովուրդը կը թարչամի, ազատութիւնը կը խոնարհուի եւ անպատիւ այլազգիները կ'իշխեն մեզ վրայ» (73):

Այդ գեղեցիկ շղթան օրէնքն է, որ չարագործին պատժելով, նրան (եւ ուրիշներին) հարկադրում է այլեւս չար չգործել. «Եթէ չլինի օրէնքի երկիւղը, մարդը չի կարող իր զգայարանները զսպել եւ մեղքից հրաժարուել» (104):

Մարդկային երջանկութեան համար դեռ եւս բաւական չէ, որ չարիքներ ու դժբախտութիւններ չգործուեն: Գրա հետ միասին նաեւ անհրաժեշտ է, որ բարեգործութիւնը խրախուսուի եւ շատանայ:

Եւ Շահամիրեանի օրէնքը այդ հնարաւորութիւնն էլ տալիս է մեզ. բարի գործողին պատիւ եւ յարգանք մատուցանելով, այդպիսով օրէնքը խրախուսում եւ առաջ է քաշում բարեգործութիւնը եւ բարի գործողներին, որովհետեւ «Եթէ բարի գործողը չտեսնի իր գործի արդիւնքը, այլ եւս բարի չի գործի» (103):

Այսպէս ուրեմն, հեղինակի կարծիքով, օրէնքը մարդկային երջանկութեան ամենախոշոր մասն ապահովում է նրանով, որ չար գործերն ու դժբախտութիւնները խափանում է,